

Inuiaqatigiinni eqqissisimanissaq inuit ataasiakkaat illersorneqarnissaannik inuiaqatigiillu isumannaatsumik ingerlanissaannik il.il. politiit qulakkeerinninnissaat, taamatullu politiit iliuuseqarallarsinaanerat pillugit Qeqqata Kommunanut ileqqoreqqusaq

Kapitali 1

Politiit ileqqoreqqusaata atuuffii il.il.

§ 1. Ileqqoreqqusaq una Qeqqata Kommuniani atuuppoq.

§ 2. Aqqusinerni allaniluunniit kikkut tamat akuuffigisinnaasaanni allatut allassimasoqartinnagu innuttaasut pissusilersornerini politiit ileqqoreqqusaat atuuppoq. Taamaalilluni kikkut tamat akuuffigisinnaasaanni, pisortat perusuersartarfiutaanni, pisortat angallassissutaanni, matumani aamma taxani, nuannaarniartarfinni taamatullu pisiniarfiit, pisiniarfissuit pisortallu allaffiisa ammanerini innuttaasut pissusilersuutaannut tunngatillugu, ileqqoreqqusaq manna atuuppoq.

Imm. 2. Ileqqoreqqusami matumani aqqusineq pineqartillugu pisortat inuinnaallu aqqusiniutaat, aqqutissiat, sikkilertarfiit, pisuinnaat aqquaat, ataatsimoortarfiit, ikaartarfiit, sullorsuit, ikaarfiusinnaasut, aqqusineqqat assigisaallu, nalinginnaasumik ataasiakkaanit arlalinnilluunniit ingerlaffigineqarsinnaasut pineqarput.

Imm. 3. Sanaartorfiusimasut ileqqoreqqusami matumani pineqartut tassaapput: Sisimiut, Maniitsoq, Sarfannguit, Itilleq, Kangerlussuaq, Kangaamiut, Napasoq aamma Atammik.

Kapitali 2

Inuiaqatigiinni eqqissisimanissap qulakkeernissaa il.il.

§ 3. Inuiaqatigiinni eqqissisimanissamat ajoqutaasumik pagginerit, nillianerit, suaartaannerit allatulluunniit nipiliornerit, persuttaanerit ajuallatsitsinerillu assigisaanilluunniit iliuuseqarnerit inerteqqutaapput.

Imm. 2. Kanngunartumik allatulluunniit mamianartumik iliuuseqarnissat, ajortuliornerit inuiaqatigiinnut allanulluunniit mamiatsatsitsinerit inerteqqutaapput.

Imm. 3. Aalakoornartutorsimalluni, allatulluunniit aalakoornitutorsimalluni aangajaarnartutorsimalluniluunniit allanut ajoqutaasinnaasunik angalaarneq inerteqqutaavoq.

Imm. 4. Nalinginnaasumik iserfigeqqusaanngitsuni imm. 1 aamma 2-mi taaneqartutigut iliuuseqartoqarpat, tamannalu inuiaqatigiinni eqqissisimanissamat akornutaappat, tamatuma unit-sinneqarnissaa politiit piumasarisinnaavaat.

§ 4. Inuiaqatigiit eqqissisimanissaannut akornutaasumik katersuunnerit inerteqqutaapput.

Imm. 2. Taamatut inuiaqatigiit akornusersorneqarsinnaanerit ingalassimaartinniarlugu, politiit tamatumuuna qaqugukkulluunniit nalunaaruteqarsinnaapput inerteqquteqarlutilluunniit.

§ 5. Aqqusinerni ingerlaaqatigiinnissat katersuunniarnerillu pitinnagit kingusinnerpaamik akunnerit 24-t sioqqullugit nammineerluni politiinut saaffiginnikkut nalunaarutigineqassapput. Nalunaarutiginninneq aqqissuisumit taassumunngaluunniit sinniisumit nalunaarutigineqassaaq, tamatumani katersuunnerup ingerlaaqatigiinnerulluunniit siunertaa, piffissaq, naapiiffissaq ingerlaarfissaq kiisalu peqataasussat amerlassusissaat ilanngullugit.

Imm. 2. Imm. 1-imi aalajangersagaq ilisiartortunut atuutinngilaq.

§ 6. Kinaluunniit sumiiffimmi aalajangersimasumi uninngaqqunagu imaluunniit aqqutissani naatsuni uteqqattaqqunagu politiit piumaffigisinnaavaat, pineqartup uninnganera uteqattaarneralunniit eqqaani najugalinnut eqqaquttunulluunniit akornutaappat, pineqartorluunniit tamaani pillaaasinnaasumik iliuseqartutut peqquteqartumik pasitsaanneqarpat.

Imm. 2. Inuk § 3-mi aalajangersakkamik arlaleriarluni unioqqutitsisimappat, kingullermik unioqqutitsiffiusumi piffimmi ungasissutsimi politiit aalajangersakkami pineqartoq uteqattaqqunagu uninngaqqunaguluunniit politiit inerteqqummik nalunaarfigisinnaavaat. Inerteqquteqartitsinissamut piumasaqaataavoq, peqquteqartumik isumaqartoqarpat, inerteqqummi ilaatinneqartuni sumiiffimmi pineqartoq kukkuluttoqqissasoq.

Imm. 3. Aqquserngit eqqarsaatigalugit, aqqusinernut tunngatillugu imm. 1-imi akulikitsumik arlaleriarluniluunniit piumaffigineqarsimasumut imm. 2-mi aalajangersagaq aamma atuutissaaq.

Imm. 4. Imm. 2 aamma imm. 3 malillugit inerteqquteqarneq allaganngorlugu nalunaarutigineqassaaq tunngavilersugaassallunilu. Inerteqqummut ukiunik marlunnik sivisunerunngitsumik piffissaliussisoqassaaq.

§ 7. Susassaqqanngitsut tummeqqani, isaarissani illunulluunniit majuartarfinni, naqqup ataani qalianiluunniit, illuni inoqqanngitsuni inissianiluunniit, quni, sanaartorfinni, angallassissutini assigisaanniluunniit uninngaqqusaanngillat.

Imm. 2. Peqquteqavinnani matukkut igalaakkulluunniit kasuttorneq, matup siarngatigut sianernej assigisaannilluunniit iliuseqarnerit, najugaqartunik akornusersuutaasinnaasut inerteqqutaapput.

§ 8. Højtalerinik, nipilersuutinik, nipilersornermi atortunik atuneq, atuneq eqqaamiunut eqqaquttunulluunniit annertuumik akornutaasutut isumaqarfiginarpat politiit inerteqqutigitisinnaavaat.

Imm. 2. Nal. 7 sioqqullugu nal. 18 kingoqqullugu aqqusinerni tuniakkat suaartaatigeqqusaanngillat, tamanna napparsimmavinnut, atuarfinnut assigisaannulluunniit akornusersuutaappat.

§ 9. Allagartarsuarnik saqqummersitanilluunniit nivinngaassuineq angallassinerluunniit, allagartanik assinilluunniit tuniniaaneq agguassinerluunniit inerteqqutaavoq, tamanna inuiaqatigiit

eqqissisimanissaannut akornutaappat imaluunniit allagartarsuit, allagartat, assilluunniit mamiatsannartuuppata.

Imm. 2. Allagartanik assilissanilluunniit mamianarsinnaasunik imalinnik illumi najugallit saniatigut taakku paatsuugassaannngitsunik inniminnigarinnngisaannik tunniussineq inerteqqutaavoq, imarisai allanut akornutaappata imaluunniit inuiaqatigiinnik mamiatsaatigineqarsinnaappata.

Imm. 3. Inuussutissarsiornermi soqutigisanik ussasaarutinik sanioqquttunut tunniussuineq inerteqqutaavoq.

§ 10. Meeraaqqat angajoqqaanit allanilluunniit nakkutigisassaasut, aqqusinerni uninngatillugit pisariaqartumik nakkutigineqassapput.

§ 11. Aqqusinerni angalatilluni angallassissutinut sikkilinulluunniit motorilinnut qimmit pituut-siinnarlugit ingerlatinneqaqqusaanngillat.

§ 12. Aallaasinik, pisissinik, illusaatinik assigisaanilluunniit atuineq, ikuallaaneq, ujaqqanik, apummik milloorneq, imermik allanilluunniit seqqartaaneq inerteqqutaavoq, sanioqquttumut tamakku naviarnartorsiortitsippata akornutaappataluunniit.

Imm. 2. Najugaqarfinit 500 meterit iluanni qoorortuunik, timmiarsiutinik, luftbæssinik aallaasinilluunniit allanik atuineq inerteqqutaavoq.

Imm. 3. Najugaqarfittaaq avataanni aqqusinerni aqquserngillu qulaallugit, sanaartukkani, eqqaavissuarni il.il. imm. 1-mi taaneqartunik aallaasinik atuineq aammattaaq inerteqqutaavoq.

Imm. 4. Aallaasit imm. 2 aamma 3-mi taaneqartunut nunatanut eqqutinnginnerini imaarne-qassapput. Nunatani taaneqartut aallaasit imallit nassaqqusaanngillat.

Imm. 5. Najugaqarfinni, imm. 2-mi aalajangersagaq apeqqutaatinnagu, politiit immikkut akuerisaanni nunatani unammilluni ooqattaasartoqarsinnaavoq.

§ 13. Sanioqquttussanut naviarnarsinaasumik ulorianarsinnaasumilluunniit suliaqartoqartillugu, assersuutigalugu illumik iluarsaassinermi aserfallatsaaliuiner Mulluunniit, sanioqquttussat eqqarsaatigalugit ungalulersuisoqassaaq. Illut silataasa iigaanik allanilluunniit atortunik qali-paasoqartillugu qalipakkap panernissaata tungaanut erseqqissumik allagarsiisoqassaaq.

Imm. 2. Illumi qaliat qalliutaasa, aputit, kusukkat assigisaalluunniit nakkarnissaat aarlerinar-pat, illumik piginnittup sanioqquttussat illersorniarlugit piaartumik eqqartik ungalulissavaa, piaarnerpaamillu aputaajaalluni kusukkalluunniit piarlugit il.il.

Imm. 3. Illuutini sulluunniit upperiaannanngorlugit nakkarsinnaanngorlugilluunniit inissinne-qassanngillat, tassa sanioqquttussanut ulorianartunngorlugit. Igalaat qajannaarlugit ikkunne-qarsimassapput.

Imm. 4. Sanioqquttussanut navianarsinnaasut sulluunniit politiit inerteqqutigisinnaavaat.

§ 14. Kommunalbestyrelsimik isumaqatigiissuteqarnermikkut, politiit tatsini nalunnguarneq allagarta-liinikkut assigisaatigulluunniit iliuuseqarfigisinnaavaat, matumanilu sumiiffinni aalajangersimasuni taaneqartuni nalunnguarneq angallannerlu ilanngullugit inerteqqutigisinnaallugu.

Imm. 2. Imm. 1-imi taaneqartutuulli politiit pujortuleeqqanik, vandscooterit assigisaallu atorlugit sissamut qanittumi angallannerit aamma malittarisassiuussinnaavaat, tamatumuuna allanut akornutaannginnissaat asuliluunniit nipiliortitsinnginnissaq eqqarsaatigalugit.

Imm. 3. Imm. 1-imi taaneqartutuulli politiit najukkani tatsini aalisarneq angalanerlu pillugit aamma malittarisassiuussisinnaapput.

§ 15. Politiit oqartussaassorluunniit, tamatumunnga politiit piginnaatitaat, allagarsiinikkut pi-sortatigoortumilluunniit nalunaarusiornikkut sinerissap avataani sikumi, umiarsualivinni, tatsini, kuunni imeqarfinnilu allani angallanneq pillugu inerteqquteqarsinnaapput.

Imm. 2. Sinerissap avataani sikumi putusisoqarpat, siku piiarneqartoq putumut assiaqutsiunneqassaaq. Putut tamarmik illersuutaasinnaasunik ungalusimaneqassasut nalunaaqutsersorneqarlutilluunniit politiit piumasaqaatigisinnaavaat.

Imm. 3. Imm. 1-imi taaneqartuni allani politiit akuersissuteqaqqaartinnagit putuliortoqassanngilaq. Putut illersuutaasinnaasunik ungaluneqassapput nalunaaqutsersorneqarlutillu.

§ 16. Pisortat pigisaanni pulaartunut eqqissisimanissamik allagarsiinikkut aalajangersakkat nalunaarutigineqartut eqqortissavaat, eqqissisimanissallu eqqortinneqarnissaanut ilitersuutit, nakkutilliisunit tunniunneqartut, malissallugit. Taamatuttaaq ipput eqqissisimanissamik aalajangersakkat allagarsiinikkut nalunaarutigineqartut, kommunalbestyrelsimit oqaaseqarfigineqareerlutik politimesterimit akuerineqartut, nunaminertat ersarinnerusumik killilersukkat inuinnarnit pisortanilluunniit pigineqartut, aqquserngit allaniluunniit nalinginnaasunik tikinneqarsinnaasut eqqarsaatigalugit, tak. § 12.

Kapitali 3

Iliuuseqarallarnert

§ 17. Inuiaqatigiinni eqqissisimanissaq, inuilluunniit ataasiakkaat pisortalluunniit isumannaat-suunissaannut navianartorsiornerit pinaveersaartinneqarnissaat pisariaqaraangat politiit piumasaqarnikkut inerteqquteqartitsinikkulluunniit iliuuseqarallarsinnaapput.

Imm. 2. Imm. 1 malillugu piumasaqarneq inerteqquteqarnerluunniit politimesterimit taassumaluunniit pisinnaatitaanit aalajangiiffineqassaaq. Aalajangiineq pisortatigoortumik nalunaarutigineqassaaq, tunngavilersugaassallunilu kiisalu aalajangiiffiup sumiiffia piffissarlu taallugit.

Imm. 3. Aalajangiinerup piffissaq atuuffissaa, sapinngisamik sivikitsuusaaq qaammatillu pingasut sinnissanagit. Piffissaliusaaq sivitsorneqarsinnaavoq, qaammatilli pingasukkaaginnarlugit. Sivitsuineq nutaamik aalajangiinikkut pisassaaq, tak. imm. 2.

Kapitali 4

Pineqaatissiinerit

§ 18. §§ 3-13 aamma § 15, imm. 2-mik unioqqutitsinerit, kiisalu § 14 aamma § 15, imm. 1-imik aamma § 16 naapertorlugit malittarisassanik aalajangersakkanillu unioqqutitsinerit imaluunniit § 3, imm. 4, § 4, imm. 2, § 6, imm. 1 aamma 2, § 8, imm. 1, § 13, imm. 4 aamma § 17 naapertorlugit naalakkiutinik inerteqqutinilluunniit unioqqutitsinerit eqqortitsinngitsoonerilluunniit pinerluttulerinermik inatsimmi aalajangersakkat naapertorlugit akiliisitsinermik arsaarinnissuteqarnermillu pineqaatissiissutigineqartassapput.

Imm. 2. Aktieselskabinit, andelselskabinit anpartselskabinit assigisaannilluunniit unioqqutitsisoqarpat, ingerlatseqatigiiffiit akiliisussanngortinneqarsinnaapput arsaarinnittoqarsinnaallunilu.

Kapitali 5

Atuutilerfia

§ 19. Politiit ileqqoreqqusaata akuersissutigineqarneranit sapaatip akunnerata ataatsip qaangiunnerani atuutilerpoq.

Imm. 2. Tamatuma peqatigisaanik Maniitsup kommuniani politiit ileqqoreqqussat marsip 16-anni 1994-imeersoq aamma Sisimiut kommunini politiit ileqqoreqqusaat juunip 11-anni 1981-imeersoq atorunnaarsinneqarput.

Taamaalilluni Qeqqata Kommuniani kommunalbestyrelsimit februaarip 28-ni 2012-imi akuersissutigineqarpoq.



Hermann Berthelsen

Borgmesteri

Ileqqoreqqusaq qulaani pineqartoq, inuiaqatigiini torersuunerup inuillu ataasiakkaat illersorneqarnissaannik inuiaqatigiillu isumannaatsuunissaannik il.il. politiit isumannaarinninnerat kiisalu politiit pineqaatissiigallarsinnaanerannik Qeqqara Kommunianut ileqqoreqqusaq matumuuna aalajangersarneqarpoq.

Nuuk, ulloq 1. Maj 2012.



Mikaela Engell

Rigsombudsmandi